

# Vuschs libanesas chantan rumantsch

Concerts finals dal project «Proxim Orient» dal choR inteR kultuR

■ (anr/am) Per il pli n'en las novitads che nus udin dal Proxim Orient betg tant bunas: raportaschas da conflicts e guerras en quella regiun n'en betg stgargas. Ina finamira dal choR inteR kultuR è stada da mussar cun il project da quest onn ch'il Proxim Orient è bler dapli che mo quai. En cooperaziun cun il chor da l'American University of Beirut han il dirigent e cumponist Fortunat Frölich e ses choR inteR kultuR vuli preschentar il Libanon sco terra en ina regiun cun in grond stgazi cultural.

### Inscunters interculturalis

Sco quai ch'il num tradescha gia è il choR inteR kultuR savens en contact cun autras culturas e visita regularmain terras estras. El sa cumpona per minga project puspè danovamain ensemen ed ha gist serrà giu ses tschintgavel project ch'els han realisà en cooperaziun cun in chor libanes. Els ultims onns ha il choR inteR kultuR manà tras dus projects a Mexico e mingamài in a Maroc ed en Pologna. Per il proxim project han las preparaziuns gia cumenzà ed ina nova interessanta terra vegn visitada da Frölich e ses chor.

### Concert vendi or

Suenter circa in onn che las chantaduras ed ils chantadurs han empra las melodias libanesas e svizas, in viadi da 35 commembers dal choR inteR kultuR a Beirut e dus concerts en il Libanon, han l'emna passada gi lieu ils dus concerts finals a Cuira ed a Turitg. En in'emprima part dal program ha il chor preschentà en roda

chanzuns popularas dal Libanon e da la Svizra, tranter auter era la chanzun engiadinaisa «Amur furtünada» da Robert Cantieni. «Sch'ins metta l'enconuscent sper insatge ester fa quai vegnir pli fina l'atgna percepziun», ha commentà Frölich quella confruntaziun da las duas culturas musicalas. En la segunda part dal concert han ils dus chors, musicists dal Proxim Orient e la chantadura palestinaisa Reem Talhami preschentà la cumposiziun «aanilhoub – about love» da Fortunat Frölich ch'unischa las duas culturas musicalas. Probabel era grazia ad ina critica en la «New York Times» ed ina contribuziun en il «Tages-Anzeiger» eran ils concerts bain visitads. L'emprim concert ha gi lieu en ina bain emplenida baselgia da sontg Martin amez la citad da Cuira. Sco punct culminant era la Predigerkirche en il Niederdörfli a Turitg vendi-

da or per il davos concert dal project.


### Frölich è satisfatg

I saja stà in grond ristg da realisar in tal project en il Proxim Orient e quai cun chantaduras e chantadurs che na fan quai betg sco professiun, di Frölich ch'ha gia realisà numerus projects sco dirigent. El saja però fitg impressiunà dal grond engaschi che minga singul en quel chor ha prestà. Medemamain cun il resultat musical eria el la fin finala dapli che mo cunten, ha el raquintà suenter il concert a Turitg.

### Proxim project: Lettonia

Strusch serrà giu in project spetga gia il proxim: «Lettland – singendes Land» en cooperaziun cun il chor letton Balts ed il dirigent letton Ints Teterovskis. La Lettonia è ina terra cun ina gronda tradiziun da chors, minga segund Letton chanta en in chor. E minga tschintg onns ha lieu la Song and Dance Celebration en la capitala Riga. A quel event vules Frölich viagià il 2018 cun ses choR inteR kultuR e dar en il rom da quella occurrenza il fanadur in concert cun il chor da giuvenils letton Balsis. Enavos en Svizra dat il choR ina representaziun al festival svizer-letton Terra Choralis a Turitg ed in concert a Cuira.

Has era ti survegni gust dad esser ina part dal choR inteR kultuR? Ils 29 da settember ha lieu da las 18.00 a las 21.00 ina prova d'infurmaziun a Turitg. Per at participar at stos ti registrar sut [www.chorinterkultur.com](http://www.chorinterkultur.com) > Mitmachen. Là chattas ti er infurmaziuns pli detagliadas.



El ha ristgà dad ir ensemen cun ses choR inteR kultuR a Beirut per realisar in project en il Proxim Orient: Fortunat Frölich. FOTO Y. ANDREA



Il choR inteR kultuR ensemen cun il chor da l'American University of Beirut ed entamez il cumponist e dirigent Fortunat Frölich. FOTO A. A. SIHA



MAD

## Parahotellaria adina pli populara

■ (rtr) L'emprim mez onn è il dumber da pernottaziuns en alloschis alternativs creschì pli fitg che tar la hotellaria classica, quai mussan las novas cifras da l'Uffizi federal per statistica. Dal schaner fin il zercladur ha la parahotellaria dumberà 7,8 milliuns pernottaziuns, quai munta ad in plus da prest 10%

ubain 700 000 pernottaziuns, cumpareglià cun il medem temp da l'onn passà. Entaifer la parahotellaria è il dumber da pernottaziuns sin campadis creschì cun 42% il pli ferm, numnadamain sin bun in milliun. Tar las abitaziuns da vacanza èn las pernottaziuns creschidas per 7% sin 4,2 mil-

liuns. Ed en albierts da giuvenetgna ed alloschis per gruppas han ins dumberà 2% dapli pernottaziuns – en tut 2,6 milliuns. Er ils hotels tradiziunals han pudì nudar in plus cun 4,4% sin 17,6 milliuns pernottaziuns. Proporzionalmain è la parahotellaria dentant creschida cleramain pli ferm.

## NOVITADS WWW.RTR.CH

### Trun: Dus candidats per la suprastanza communal

Ils 24 da settember elegia Trun sia suprastanza communal. Abditgà han ils dus cussegliers communnals Curdin Tuor e Toni Pfister. Per els dus stattan Kurt Wolf da Trun/Tiraun ed Erica Cavagn-Pfister da Trun/Schlans a disposiziun. Quai ha il president communal Dumeni Tomaschett confermà ad RTR. Er el stat a disposiziun per ina ulteriura perioda d'uffizi da trais onns. E cun el candideschian era Giachen Albrecht e Lucas Arpagaus puspè per la suprastanza communal da Trun.

### «Kesb» intervegn en dapli cas

L'onn passà ha l'autorità per la protecciun da l'uffant e da creschids «Kesb» intervegnì en dapli cas che l'onn avant. Uschia sajan las mesiras per proteger uffants s'augmentadas per 4,5% sin bunamain 42 800. Tar ils creschids haja la Kesb registrà passa 89 600 cas – in plus da 3,5. Quai resulta da la statistica che l'autorità ha publictà. Las bleras mesiras pertugant ils uffants sajan stadas en connex cun dispitas davart il dretg da visita u l'abilità d'educar manglusa da geniturs. Las mesiras da la Kesb en cas d'educaziun manglusa han la finamira che la responsabladad restia tar ils geniturs. Quels vegnan dentant sustegnids dad in assistent professiunal. Il cas che la Kesb ha stuì intervegnir talmain, ch'ils uffants han stuì bandunar il dachasa dals geniturs, fan ora circa 10%. Dals circa 18 000 uffants en Svizra che vivan en ina chasa d'uffants ubain en ina famiglia da tgira han la Kesb ubain la Dretgira penala per giuvenils ordinà tar circa in terz in plazzament ester. Tar ils auters cas è il plazzament ester vegnì decidì en enclegientscha cun ils geniturs ubain la scola.

## Ulteriura crudada da crappa al Piz Cengalo

En il territori da bova en la Val Bregaglia è danovamain vegnì giu crappa il glindesdi saira. La crappa n'è questa giada però betg vegnida giu fin en il vitg. Quai han confermà las autoritads da la vischnanca Bregaglia envers RTR. En il batschiglèn fin ussa sa rimnads da quai da 200 000 meters cubics crappa. Per rumir quella crappa ha il chantun segnà duas novas deponias. Ina pli pitschna sa chatta giu en la val ed ina pli gronda vi da la costa. Quellas ston uss vegnir preparadas, vul dir il humus vegn transportà davent. Pli tard vegn quel lura puspè duvrà per covrir la crappa, uschia ch'il terren d'agricultura è puspè utilisabel. La pitschna deponia duess esser pronta gia mesemna. Pervi dal privel memia aut na dastga l'armada svizra betg anc intervegnir, er sche la schuldada fiss pronta a Bondo. Quai ha ditg cusseglier guvernativ Christian Rathgeb. Il cusseglier federal Guy Parmelin haja bain empermess agid, ils commembers da l'armada stoppian dentant pudair ir en segirtad entaifer quatter minutas. Quai na saja betg pussaivel il mument. Rathgeb ha accentuà ch'enturn in milliun meters cubic material al Piz Cengalo possian rumper giu da tut temp. Sco Yves Bonanomi, il geolog responsabel al Piz Cengalo, ha ditg ad SRF

vegna quai er a dar ils proxims dis pitschnas crudadas da crappa ed i vegnia a durar in temp pli lung fin che la situaziun saja sa calmada dal tuttafatg. Il mument na possian ins betg dir cura ch'il milliun meters cubic grip restant vegnia a val, ha ditg Bonanomi. La bova gronda da Bondo cun probablamain ogt morts vegn er examinada da la polizia. I va per la dumonda sch'ils viandants sajan vegnids avertids bain avunda dal privel enconuscent d'ina bova. Quai communitgescha la polizia. La Procura publica dal Grischun saja orientada. Tenor la presidenta communal da Bregaglia, Anna Giacometti, ha la vischnanca plazzà pliras tavlas sper las sendas da viandar che han avertì dal privel da vita entras bovas u crudada da crappa. Vitiers hajan ils possessurs dad aclas en la Val Bondasca survegni brevs d'avertiment. Ina sumeglianta catastrofa cun crudada da crappa sco a Bondo en la Val Bregaglia poi era dar en ulteriuras parts da las Alps. Uschia vegnian sulet en las Alps 100 paraids da crap controlladas 24 uras a di, scriva la «SonntagsZeitung». Era dettia plirs systems d'alarm per talas bovas sco a Bondo. Il pli fitg pertutgads vegnan ad esser ils chantuns da Berna, Vallais, ma er il Grischun, scriva la «SonntagsZeitung».



Anc na dastga l'armada betg gidar a rumir la bova a Bondo. KEYSTONE

## L'AURA

### Il sulegl svanescha plaunet

**Situaziun generala:** In current aut maina dal sidvest aria pli umida vers las Alps.

**Oz:** Nord e Grischun central: Detg sulegliv, il suentermezdi nivels da cumulus e vers saira intgins temporals. Temperatura la damaun 15 fin 20 grads, il suentermezdi 31 grads. Sid da las Alps ed Engiadina: Detg sulegliv, vers saira nivels ed intgins uradis.

**Prognosa:** Nord: Gievgia anc scleridas e cun favugn sitg. Venderdi ferm surtratg e plievgius, cunfin da naiv sa sbassa da 3000 sin 2000 meters. Sonda savens surtratg ed intgins uradis, dumenzia aura variabla. Sid: Gievgia fin sonda surtratg ed intgins uradis.

